

**PM: Projek Pembangunan Lebih Mudah Bila Kerajaan Negeri Dan Pusat Di Bawah Satu Payung Bernama  
7 Sept, 2013**

KUANTAN, 7 Sept (Bernama) -- Datuk Seri Najib Tun Razak berkata pelaksanaan sebarang projek pembangunan untuk kesejahteraan rakyat adalah lebih mudah apabila kerajaan negeri dan persekutuan bernaung di bawah payung yang sama.

Perdana Menteri berkata rakyat akan mendapat manfaat sepenuhnya hasil pilihan bijak mereka ketika mengundi memilih kerajaan.

"Inilah yang berlaku di negeri Pahang apabila kesetiaan rakyat Pahang tetap bersama Barisan Nasional, maka mudahlah segala bentuk kerjasama antara kerajaan negeri dan persekutuan dijalinkan demi memberikan perkhidmatan terbaik kepada rakyat," katanya.

Beliau berkata demikian ketika merasmikan majlis pecah tanah projek pembinaan Kompleks Pentadbiran baharu kerajaan negeri Pahang bernilai RM399 juta di kawasan seluas 24.8 hektar di Kota Sultan Ahmad Shah (Kota SAS) , di sini hari ini.

Projek yang dijangka siap dalam masa tiga tahun itu bagi menggantikan Wisma Seri Pahang, pusat pentadbiran kerajaan negeri ketika ini, yang telah berusia 45 tahun dan dilaporkan memerlukan kos baik pulih yang tinggi.

Berdasarkan perancangan, kompleks pentadbiran baharu itu akan menjadi ikon kepada negeri Pahang apabila bentuk bangunan kompleks itu diinspirasikan daripada jata (logo) negeri Pahang selain mengaplikasikan penggunaan teknologi hijau dalam usaha memulihara kualiti persekitaran.

Komponen kompleks itu terdiri daripada bangunan Dewan Undangan Negeri Pahang, bangunan kerajaan negeri dan bangunan kerajaan persekutuan.

Najib yang merupakan bekas Menteri Besar Pahang dan pernah menduduki bangunan Wisma Seri Pahang, berkata sudah tiba masanya kompleks baharu yang lebih canggih dibina bagi memberikan perkhidmatan lebih efisien.

Sementara itu, Menteri Besar Datuk Seri Adnan Yaakob berkata kewujudan bangunan baharu itu kelak akan memberi impak peningkatan produktiviti kakitangan awam, sekali gus memberi manfaat kepada penduduk Kuantan khususnya dan penduduk Pahang amnya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=975909>